

DECLARATION

DV ROY, CONTRE

MONSIEVR LE DVC DE NE-
uers, & tous ceux qui l'assistent.

*Verifiee en Parlement le dixseptiesme
Ianuier mil six cens dixsepr.*



A PARIS,

Chez F. D. MOREL, & P. METTAYER,
Imprimeurs ordinaires du Roy.

M. D C. XVII.

Avec Privilege de sa Majesté.





LOUIS par la grace de Dieu
 Roy de France & de Nauarre,
 A tous presens & à venir, Sa-
 lut. Nous nous estions pro-
 mis depuis le traicté faict en nostre ville
 de sainte Menehoult, le 15. iour de May
 mil six cens quatorze, que le Duc de Ne-
 uers touché du regret qu'il deuoit sentir
 d'auoir le premier leué les armes contre
 nous, & par la surprise de nos ville, &
 Citadelle de Mezieres, commencé le
 trouble qui auoit alors esté en ce Royau-
 me, & obligé outre son deuoir par le fa-
 uorable traictement, & les graces &
 biens-faicts qu'il a receuz de nous, de-
 meureroit à iamais en la fidelité & obeis-
 sance qu'il nous doit, selon les protesta-
 tions qu'il nous en a souuent faictes: Et

pour ceste occasion nous aurions dissimulé plusieurs excès, outrages, & violances faictes à aucuns de nos Officiers, au mespris de nostre autorité, & scandale public de nos subiects, & autres actes qui meritoient vne seuerie punition: Mais il auroit commencé durant nostre voyage de Guyenne, & la guerre qui nous fut faicte en mesme temps, à nous faire cognoistre qu'il continuoit en ses mauuaises volontez. Car voyant qu'il seroit peu assisté s'il ne trouuoit moyen de se preualoir de nostre nō & autorité, il nous auroit requis de luy octroyer des commissions pour leuer des gens de guerre quand nous le luy ordonnerions, lesquelles nous ne luy voulusmes refuser sur l'assurance qu'il nous donna d'en vser de ceste sorte, & puis s'en seruant contre sa promesse & nostre intention, il auroit faict des leues sans attendre nostre commandement, & en beaucoup plus grand nom-

bre que lesdictes commissions ne por-
toient: auroit tenu toutes ces troupes à
la ruine de nostre pauvre peuple, sans les
employer à nostre seruice, & mesmes en
auroit fortifié nostre Cousin le Prince
de Condé, vne partie d'icelles s'estant
iointes aux siennes lors qu'il passa la ri-
uiere de Loire, ce qu'il n'eust (peut estre)
peu faire, sans les basteaux, qui à la fa-
ueur dudit Duc de Neuers descendirent
à Bony, de Neuers & de la Charité, & fa-
cilitèrent ce passage qui a esté cause de
tant de maux en ce Royaume. Neant-
moins nous n'aurions encores voulu
laisser de luy continuer nos graces & fa-
ueurs, aurions pris en bonne part son
entremise au traicté de Loudun, quoy
que par toutes ces choses-là, & sa proce-
dure en iceluy, il ne fut que trop notoire
qu'elle ne tendoit pas tant à remettre
nostre Royaume en paix, qu'à fauoriser
ceux qui le troubloient: & depuis luy
aurions commis vne honorable legatio

en Allemagne, de laquelle s'estant chargé, il prit cōgé de nous sur la fin du mois d'Aoust dernier pour s'y en aller, mais ayant sceu par les chemins que nous nous estions asseurez de la personne de nostre Cousin le Prince de Condé, il se feroit de luy mesme arresté en nostre prouince de Champagne, & nous auroit escript des lettres sur ce subiect : par lesquelles nous tesmoignant ouuertement sa mauuaise volōté, & le peu d'estat qu'il faisoit de nostre authorité, il demandoit d'estre esclarcy des raisōs qui no⁹ auoiēt meu à prendre ceste resolution : auroit eu de grandes cōmunications avec ceux qui en mesme temps s'estoient retirez à Soissons, & sembloient se preparer à prendre les armes contre nous, & pour estre plus proche d'eux seroit reuenue en nostre ville de Reims (outre laquelle il estoit ia passé) & ayant assemblé les habitans, leur auroit faict entendre qu'il se resoluoit de faire leuer six cens cheuaux,

& quatre mille hommes de pied, propo-
 sant aux esleuz d'imposer vne partie de
 la somme necessaire pour l'entretene-
 ment de ces troupes: ce qu'ayans refuse
 de faire sans nostre commandement, il
 leur offrit d'aduancer l'argent pourueu
 qu'ils consentissent à ladite leuee, dont
 s'estans encores excusez, & remis aux
 Tresoriers de France establis en nostre
 ville de Chaalons, il dict qu'il vouloit al-
 ler en ladiete ville pour faire effectuer
 ceste proposition, & y enuoya deuant
 quelques vns des siens qui demandoiēt
 logis pour quatre cens cheuaux, prirent
 deux hostelleries proches des deux prin-
 cipales portes de ladite ville, & voulurēt
 (contre la coustume) marquer les mai-
 sons des Chanoines, disans en auoir be-
 soing pour des Seigneurs de qualite qui
 l'y deuoient venir trouuer: ce qui mit les
 habitans d'icelle en telle apprehension
 de sa venue, que d'eux mesmes ils en-
 uoyerent prier le sieur de Vaubecour qui

venoit nous trouuer avec son Regimēt,
 de ne s'esloigner d'eux pour quelques
 iours, d'autant qu'ils craignoiēt d'auoir
 besoin de son assistance, & se iugeoient
 estre en grand peril. Surquoy ayāt vou-
 lu pourueoir à leur seureté, cōme il estoit
 necessaire, nous auriōs ordonné au Cōté
 de Trefmes, Gouverneur de ladite ville
 & ausdits habitans, que si ledit Duc s'y
 presentoit sans commandemēt de nous,
 ils differassent de l'y receuoir iusques à ce
 qu'ils eussent autre aduis de nostre part;
 de sorte que ledit Duc de Neuers persi-
 stant en la resolutiō qu'il auoit prise d'y
 aller, auroit esté prié d'en abstenir, dōt
 nous ayant faict plaincte, nous luy au-
 rions librement déclaré les occasions de
 soupçon & desfiance qui nous auoient
 meū à donner cet ordre: mais au lieu de
 les faire cesser, cōme il estoit en son pou-
 uoir, il fit publier & enuoya par toutes
 les villes de ladite prouince, & encores
 plus loing, mesmes en celle-cy, & ius-
 ques

ques en nostre Cour, des coppies imprimées des lettres qu'il nous auoit escrites sur ce sujet, avec d'autres dont il les accompagna, par lesquelles il s'efforçoit, non seulement de faire prendre en mauuaise part ce qui s'estoit fait en cela par nostre commandement : mais aussi de blasmer & descrier la conduite de nos affaires, & d'en donner de sinistres impressions aux peuples, & aussi tost seroit party de nostre ville de Reims, craignant que les habitans allarmez des propositions qu'il leur auoit faites, & excitez par le soing qu'ils ont tousiours eu de se maintenir en leur deuoir, & par ce qui s'estoit passé à Chaalons, le contraignissent d'en sortir. Mais quelque temps apres voulant, comme il est vray semblable, esprouuer si ces mauuais bruits qu'il auoit fait courre, & les artifices dont il auoit vsé pour refroidir & desbaucher les affections de nos sujets, avec les pratiques qu'aucuns de ses adherans fai-

soient continuellement dans ladite ville, luy auroient profité enuers les habitans d'icelle, il s'en seroit approché, & la Duchesse de Neuers sa femme s'estant aduancée pour luy en preparer & asseurer l'entree (bien que ce fut sous autre pretexte) elle se seroit présentée le xiiij. iour de Nouembre aux portes de ladite ville, où arriuant elle auroit commandé (ainsi que peu auparauant vn des siés auoit ia faict de sa part) au Lieutenât de ville, & autres habitans qui y estoient, de se saisir de la personne du Marquis de la Vieuille nostre Lieuteant general au gouuernement de ladite ville, des iurisdctions qui en dependent, & du Duché de Rethelois. Et sur ce qu'il l'auroit priée de se retirer, luy disant ne la pouoir laisser entrer en ladicte ville, elle auroit usé enuers luy de plusieurs menaces & injures, nonobstant qu'il fut en la fonction de sa charge, en laquelle il a l'honneur de représenter nostre per-

sonne, & qu'il luy eust declaré qu'il ex-
 cutoit nostre commandement: Ce qu'il
 estoit obligé de faire d'autant plus exa-
 cttement qu'il y auoit des gens de guerre
 non aduoüez, sinon dudit Duc de Ne-
 uers, aux environs de ladite ville, & que
 l'on y auoit veu peu auparauât quelques
 chariots chargez d'armes, petards, es-
 chelles, & autres choses semblables. mais
 ledit Duc de Neuers non content du
 mauuais & indigne traictement que le-
 dit Marquis de la Vieuille auroit receu
 en nous seruant & faisant son deuoir en
 ceste occasion, Il auroit le lendemain
 fait surprendre sa maison de Sy par grãd
 nombre de soldats, & y auroit estably
 garnison, & quelques iours apres sur ce
 qu'il auroit sçeu le iuste mescontente-
 ment que nous en auions, pensant d'un
 foible pretexte couvrir ceste induë en-
 treprise, il auroit faict faire vne faicte
 feodale, dõt la forme mesme & les ter-
 mes inconsidererez dequoy vsent ses offi-

ciers, estoient aussi cōtraires que l'effect
 à nos droits souuerains, & au respect qui
 nous est deu. Dequoy estans aduertis,
 nous depeschasmes vers luy vn exempt
 des Gardes de nostre corps pour faire re-
 tirer ladite garnison (qui n'estoit moins
 au mespris de nostre autorité, qu'au
 preiudice dudit Marquis de la Vieuuil-
 le) & pour entrer & demeurer de nostre
 part en ladite maison: mais ledit Duc de
 Neuers l'auroit renuoyé, sans pour ce
 voyage nous faire rendre aucune obeis-
 sance, & au contraire auroit tenu audit
 Exempt, & aux Archers qui l'accompa-
 gnoient plusieurs mauuais langages cō-
 tre le respect qui nous est deu, & à la
 Royne nostre tres-honoree Dame &
 mere, & entre autres qu'ils estoient souz
 la baguette, qu'il n'y estoit plus, n'estant
 plus à la Cour, & qu'il esperoit qu'ils en
 feroient dehors dans trois mois, & qu'il
 yroit avec vingt-mil hommes au deuât
 du sieur de Prallain commandant nos

forces dans ladite prouince : en suite
desquels il est venu aux effects, car il a
faict faire sous son nom, & sans ordre
ny Commission de nous, contre les loix
& ordonnances anciennes de nostre
Royaume, & nos declarations & defen-
ses nouuellement publiees, des recher-
ches & leuées d'hommes d'as ladite pro-
uince, leur donnant à entendre que c'e-
stoit pour nostre seruice, & ce par les
sieurs d'Aubilli Capitaine de Charle-
uille: de Selles, Cappitaine de nostre vil-
le de Rethel: la Chapelle fils du Capi-
taine de la Citadelle de Mezieres: Boif-
jardin Capitaine des gardes dudit Duc,
& plusieurs autres par luy praticquez,
ses complices & adherans, qui non seu-
lement en ont mis grand nombre dans
nosdites villes de Mezieres & Rethel, &
dans la Cassine, Chasteau porcien, Ri-
checour, & autres maisons, mais ont pas-
sé iusques là d'en faire entrer par surpri-
se le premier iour du mois de Decembre

dernier en nostre ville de saincte Mene-
 houft, au grand regret des habitans qui
 estans tres-affectionnez à nostre seruice,
 & ne pouuans supporter d'estre con-
 traincts par ceste violence à y manquer,
 ont abandonné leurs demeures, & se sont
 retirez ez villes voisines, & mesmes en
 quelques vnes hors de nostre Royaume
 en nombre de trois ou quatre cens, qui
 eussent esté suiuis de plusieurs autres si
 ladite ville n'eust esté remise en nostre
 obeyssance, comme elle fut le 26. dudit
 mois, auquel iour ceux qui y estoient de
 la part dudit Duc, en estans sortis, l'on
 vit qu'ils estoient pres de cinq cens hom-
 mes de guerre, qui se retirerēt à Rethel
 & à Mezieres avec ceux qui y estoient
 auparauant, & que l'on y leue, & enrool-
 le encores tous les iours ouuertement.
 Mais comme depuis que l'on a vne fois
 fermé les yeux au respect & au deuoir,
 les crimes vont tousiours croissant, & la
 desobeyssance n'a plus de bornes, ledit

Duc de Neuers a encores entrepris da-
 uantage, car il a faict entrer des gens de
 guerre estrangers dans nostre Royaume,
 & entre autres a receu depuis peu de
 iours en nostredite ville de Mezieres
 nombre de Liegeois, conduits par vn
 nommé Galopin habitant de Charle-
 uille, qui doiuent estre suiuis de plus grâ-
 des troupes, y ayant des gens exprés en
 Liege qui asseurent des hommes de sa
 part, ainsi que faisoit le Baron de Pes-
 ché, lors qu'il y a esté tué, & ce pendant
 ledit Duc de Neuers achete de tous co-
 stez grand nombre de cheuaux, & faict
 trauailler publiquement, & par coruées
 & contrainctes, dont il enuoye aux ha-
 bitans des parroisses les mandemens si-
 gnez de luy, aux fortifications desdites
 villes, & de Chasteau-porcien, & Riche-
 cour, & qui plus est faict ruiner pour cét
 effect l'vn des Fauxbourgs de Mezieres
 où habitoient grand nombre de nos
 pauvres subiects, avec telle audace &

mespris de nostre authorité, que pour la
 maintenir & arrester le cours de ces en-
 treprises & desobeissances, nous som-
 mes contraincts d'y employer les moyès
 que Dieu nous a mis en main pour les
 reprimer, & ranger au deuoir ceux qui
 s'en departent. Aquoy ne voulans tou-
 tesfois nous resoudre que le plus tard
 qu'il nous seroit possible, & avec gran-
 de cognoissance de cause, nous aurions
 enuoyé il y a desia quelque temps en la-
 dite prouince les sieurs de Caumartin
 Conseiller en nostre Conseil d'Estat, &
 d'Ormesson aussi Conseiller en nostredit
 Conseil, & Maistre des Requestes ordi-
 naires de nostre Hostel pour informer
 de ces contrauétions à nosdites ordon-
 nances & declarations, & entreprises fai-
 tes sur nostre authorité, & proceder
 contre les coupables, esperans que leurs
 procedures seruiroient non seulement à
 esclarcir la verité, mais aussi à donner
 loisir & occasion audit Duc de se reco-
 gnoistre

gnoistre fuiuant les exhortations & ou-
 uertures qui luy ont esté faictes à ceste
 fin de nostre cognoissance & volonté;
 encores que pour nostre dignité nous
 n'ayons déclaré que ce fut de nostre
 part. Mais tant s'en faut qu'il ait fait son
 profit de nostre patience & bonté, qu'au
 contraire, il s'est engagé plus auant en
 sesdites entreprises & desobeissance, fai-
 sant à present faire des leues de gens de
 guerre en Niuernois, & continuant plus
 ouuertement qu'auparauant celles qu'il
 auoit commencées en Champagne: car
 nous sommes aduertis que depuis peu
 il a baillé de l'argent à plusieurs Gen-
 tilshommes du pays & des circonuoisins
 pour faire des compagnies de cheuaux
 legers, & qu'il a tellement augmenté la
 garnison qu'il auoit mise dás Retel, qu'il
 y a aujourd'huy plus de mille hommes
 qui y ont n'aguères faict monstre pu-
 bliquemét, & esté payez de ses deniers,
 & a faict prendre par aucuns de ladite

garnison sous la conduicte dudit Boif-
 jardin Capitaine de ses gardes , & me-
 né prisonnier en ladite ville, le Preuost
 prouincial de ladite prouince avec dix
 de ses Archers , & vn Greffier qu'ils y re-
 tiennent encores. Il a aussi faict prendre
 vn habitant de Mezieres nommé Char-
 lot, lequel il auoit auparauant menacé
 plusieurs fois, sur ce que son fils Con-
 seiller au siege presidial de Rheims voy-
 oit le Marquis de la Vieuille , &
 nous seruoit audit lieu, & faict escrire
 par ledit Charlot à son dit fils (qu'il a
 pensé deuoir estre vn des iuges du sieur
 de Mondeious prisonnier pour auoir
 porté les armes contre nostre seruice &
 nosdites Ordonnances) qu'il receura le
 mesme traictement dans la citadelle de
 Mezieres où il est retenu, que nos Offi-
 ciers feront audit de Mōdejous, comme
 s'il luy estoit loisible d'empescher qu'ils
 facent iustice, & s'il pouuoit vser de re-
 presaille enuers nous: chose que les sou-

uerains nē font que tres-raremēt les vns contre les autres. Tellement qu'il a passé si auant que nous ne pouuons plus differer les remedes necessaires en occasiō si importante, & deuons aussi declarer nostre volonte & intention sur icelles, afin que ledit Duc ne puisse par les pretexts dont il essaye de pallier sa desobeissance & rebelliō, deceuoir ceux qui ne seroient informez de la verité. A

CES CAUSES SÇA VOIR FAISONS
 Qu'apres auoir faict veoir les informations faictes par nosdits Commissaires, & autres nos Officiers en nostredite province de Champagne, & mis ceste affaire en deliberation en nostre Conseil, où estoient la Royne nostre tres-honoree Dame & Mere, aucuns Princes de nostre sang, Autres Princes, Ducs Pairs Officiers de nostre Couronne, & autres principaux seigneurs de nostredit Conseil, N O V S auons dict, & declare, disons & declaron par ces presentes si-

gnées de nostre main, ledict Duc de Neuers & tous ceux qui l'assistent ou assisteront en sa desobeissance, adherent ou adhereront à ses desseings, decheus de tous honneurs, dignitez, Estats, Offices, pouuoirs, Gouuernemens, charges, pensions, priuileges, & prerogatiues qu'ils ont de nous, ou des Roys nos predecesseurs, & les auons reuocquez, & reuoquons dès à present, declarant ledit Duc, & tous ses adherens, desobeissans, rebelles, perturbateurs du repos public, & criminels de leze Majesté, & comme tels voulons qu'il soit procedé contre eux, tant en leurs personnes, que biens, memoire & posterité, ensemble contre tous ceux qui l'assisteront ou fauoriseront directement, ou indirectement.

M A N D O N S à tous Gouverneurs & Lieutenans generaux de nos prouinces, Capitaines, chefs, & conducteurs de nos gens de guerre de leur courre sus, & à tous nos officiers, Maires, Consuls & Es-

cheuins de nos villes de se faisir de leurs personnes, s'ils se trouuēt en icelles pour les mettre en nos mains, & les poursuiure par toutes les voyes & rigueurs de nos ordonnañces faictes sur semblables crimes: sauf neátmoins si dás quinze iours apres la publication qui sera faicte des presentes en nostre Cour de Parlement, ledit Duc ne recognoist la faute, ne nous vient trouuer pour s'acquiter effectuellement & personnellement entre nos mains de ce qui est de son deuoir en nostre endroict, & ne faict retirer & sortir hors nostre Royaume les estrangers qu'il y a faict venir, licentier tous les gens de Guerre qui ont esté leuez, & oster les garnisons establies par luy, ou les adhe-rens, sans ordre ny commission de nous. Et pour le regard des Gentils-hommes & autres nos subiects, si dans le dit téps ils ne se presentēt aux sieges de nos Bailliages & Seneschauflées, au ressort desquels ils font leur residence pour en fai-

re declaration, & protestation enregistree aux Greffes d'iceux, & ne se deportent entierement de toutes actions & entreprises preiudiciables à nostre authorité & seruice, & à nostre ordonnances, declarations & defenses : auquel cas ledict Duc, & tous autres qui l'auront assisté demeureront exempts & deschargez des peines portées cy dessus, & seront receuz en nostre bonne grace. Si donnons en mandement à nos amez & feaux Conseillers, les gens tenans nos Cours de Parlement, Baillifs, Seneschaux, ou leurs Lieutenans, & tous autres nos Iusticiers & Officiers qu'il appartient, chacun endroict soy, que ces presentes ils registrēt ou facent registrer, garder & obseruer selon leur forme & teneur, & à nos Procureurs Generaux desdites Courts, faire toutes poursuites & diligences pour l'execution d'icelles, & faire punir & chastier ceux qui y contreuiendront. CAR tel est no.

stre plaisir. En tesmoing de quoy nous auons faict mettre nostre seel à cesdites presentes. D O N N E à Paris au mois de Ianuier, l'an de grace, mil six cens dix-sept, & de nostre Regne, le septiesme.

Signé,

LOVIS.

Et a costé visa.

Par le Roy,

P O T I E R.

Et sceellee du grand seel de cire verte, en lacs de soye rouge & verte.

Leuës publiees, & registrees, oy & ce requérant le Procureur General du Roy, ordonne la Cour que coppies seront enuoyées aux Bailliages, & Seneschauſſees de ce ressort, pour y estre leuës, publiées, registrees & executees à la diligence des Substituts du Procureur General du Roy, auxquels enjoint d'en faire les diligences, & de tenir main à l'execution, & certifier

la Cour auoir ce faict. A Paris en
Parlement, le dix septiesme lanuier,
mil six cens dix-sept.

Signé,

DV TILLET.